



Amaran!

Pihak Jabatan Agama Islam Perak tidak bertanggungjawab ke atas sebarang penambahan ayat selain daripada kandungan khutbah yang dikeluarkan.

## "GURU INSANI: PEMANGKIN MEMBANGUNKAN MASYARAKAT BERTAMADUN"

12 Mei 2023 / 21 Syawal 1444

الْحَمْدُ لِلّٰهِ<sup>1</sup> الْقَائِل

...يَرَفَعَ اللّٰهُ الَّذِينَ آمَنُوا مِنْكُمْ وَالَّذِينَ أُوتُوا الْعِلْمَ دَرَجَاتٍ وَاللّٰهُ بِمَا تَعْمَلُونَ خَيْرٌ ﴿١١﴾

(Surah al-Mujadalah ayat 11)

أَشْهَدُ أَنْ لَا إِلَهَ إِلَّا اللّٰهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّداً عَبْدُهُ وَرَسُولُهُ. اللّٰهُمَّ صَلِّ  
وَسَلِّمْ عَلَى سَيِّدِنَا مُحَمَّدٍ<sup>2</sup> وَعَلَى آلِهِ وَأَصْحَابِهِ وَالثَّابِعِينَ لَهُمْ بِإِحْسَانٍ إِلَى يَوْمِ الدِّينِ. أَمَّا  
بَعْدُ، فَيَا عِبَادَ اللّٰهِ! اتَّقُوا اللّٰهَ<sup>3</sup> أَوْصِينُكُمْ وَإِيَّاهُ يُتَّقَوِّيَ اللّٰهُ فَقَدْ فَازَ الْمُتَّقُونَ.

### Sidang Jumaat Yang Dirahmati Allah,

Marilah kita tingkatkan ketakwaan ke hadrat Allah SWT dengan melaksanakan segala perintah dan meninggalkan semua larangan Nya, mengikhlaskan setiap amal, semoga kita sentiasa mendapat taufik dan hidayah serta diperkuuhkan iman mengabdikan diri semata-mata kepada Allah Yang Maha Esa. Menjelang sambutan Hari Guru, mimbar akan memperdengarkan khutbah bertajuk:

### "GURU INSANI: PEMANGKIN MEMBANGUNKAN MASYARAKAT BERTAMADUN"

Tarikh 16 Mei disambut sebagai Hari Guru, bagi menghargai khidmat dan bakti yang diabadikan oleh para guru. Guru ialah warga pendidik, pengajar dan pengasuh. Mereka berkorban seluruh jiwa dan raga, masa, wang dan tenaga demi kemajuan anak didik, tanpa mengenal putus asa. Guru umpsama ibu bapa kedua, tanpa jemu mereka mencerahkan ilmu. Para guru tekun menitipkan nasihat, membimbing anak didik ke jalan yang benar, agar anak didik menjadi insan berilmu, berpengetahuan, berkemahiran dan berakhhlak mulia. Para guru gigih berusaha membimbing anak didik agar menjadi khazanah berharga kepada negara bangsanya.

<sup>1</sup> Memuji Allah<sup>2</sup> Selawat ke atas Nabi Muhammad SAW<sup>3</sup> Pesan Taqwa



Islam meletakkan taraf yang tinggi terhadap nilai-nilai keilmuan dan perkara yang berkait dengannya, merangkumi orang yang menyampaikan ilmu dan penuntut ilmu. Martabat guru sangat tinggi dan mulia sesuai dengan ketinggian ilmu. Terkandung pelbagai ayat al-Quran juga hadis Baginda SAW yang menerangkan kemuliaan guru. Antaranya ayat 11 surah al-Mujadalah yang khatib bacakan pada awal khutbah yang bermaksud:

"...Allah akan mengangkat (darjat) orang yang beriman antara kamu, dan orang yang diberi ilmu (dalam kalangan kamu) beberapa darjat. Dan (ingatlah) Allah Maha Mendalam Pengetahuan Nya tentang apa-apa yang kamu lakukan".

### **Mukminin yang dirahmati Ilahi,**

Guru insani bukan sahaja memiliki pengetahuan dan menguasai ilmu, malah memiliki sifat-sifat mulia seperti sabar, tekun, prihatin, hormat, serta daya menyelami dan memahami perasaan atau emosi insan lain. Warga pendidik berperanan besar dalam usaha mencanai pemikiran warga, agar terbina masyarakat yang bertamadun, berakhlik mulia, tinggi budi pekerti, berhemah, bermaruah, jujur, ikhlas, matang berfikir, menghargai keamanan dan kerukunan, serta bersifat patriotik kepada negara bangsanya.

Pendeta Za'aba menyifatkan ilmu sebagai asas terpenting yang menyelamatkan manusia daripada belenggu kemunduran. Ilmu ialah asas utama dan landasan untuk mencapai kejayaan. Kemajuan dan tahap kebijaksanaan sesuatu bangsa terletak pada tahap penguasaan ilmu yang boleh dicapai melalui pendidikan yang berkualiti dan melalui khidmat bakti para guru yang berdedikasi.

Ilmu berlegar dalam orbit yang amat luas, singgah dan bermastautin daripada minda ke minda melalui perantaraan. Guru ialah insan berilmu yang berada dalam alam ilmu, berperanan sebagai perantara yang menyempurnakan amanah untuk menyampai, memanjang dan mengembangkan ilmu. Para guru merupakan pendidik, mengambil tanggungjawab membimbing manusia menemui sinar kebenaran melalui ilmu. Guru memenuhi peranan mengajar dan mendidik, turut berperanan sebagai pengasuh dan pembimbing, memberikan panduan dan teladan. Anas bin Malik Radiallahu anhu meriwayatkan betapa besarnya peranan guru yang diibaratkan bintang-bintang di langit



yang menjadi petunjuk jalan – menerangi laluan bersandarkan sabda Rasulullah Sallallahu Alai Wassalam bermaksud:

"Sesungguhnya perumpamaan orang yang berilmu pengetahuan di muka bumi ini seperti bintang-bintang di langit yang menjadi petunjuk dan menerangi dalam kegelapan, sama ada di daratan mahupun di lautan, apabila ia terbenam atau hilang, dikhuatiri akan hilang arah tujuan" (Riwayat Imam Ahmad)

Para guru diasuh menjiwai semangat pendidik yang ikhlas, semangat pendidik yang tekun dan semangat pendidik yang bersungguh, mengasuh dan membimbing anak-anak didik agar menjadi insan berilmu. Sebaik-baik kitab bagi seorang murid ialah gurunya; guru ialah pusat kepada pendidikan, bertanggungjawab mencanai minda murid, membekalkan kompas agar muridnya berupaya menakhodai pelayaran hidup, memberikan inspirasi dan motivasi kepada anak-anak didik. Guru yang hebat berupaya menerokai lapisan-lapisan potensi yang terkandung dalam diri setiap murid, dan mencungkil setiap bakat yang terselindung untuk memungkinkan anak-anak didik mencapai kejayaan dan mencipta kecemerlangan. Sesungguhnya guru berperanan amat penting mengilmukan insan. Dalam kitab *Ihya' Ulumuddin*, Imam al-Ghazali memetik sabda Rasulullah Sallallahu alai Wassalam yang bermaksud;

"Bahawa Allah SWT, malaikat-malaikat, isi langit dan bumi, sampai kepada semut di dalam lubang dan ikan di laut, semuanya berdoa kebajikan orang yang mengajarkan manusia."

### **Para Tetamu Allah yang dimuliakan,**

Dalam memenuhi amanah dan tanggungjawab mengilmukan anak didik, para guru berhadapan dengan pelbagai ujian dan cabaran. Ada kalanya para guru diperlukan memikirkan ramuan dan pendekatan baharu ketika menghadapi masalah di luar jangkaan. Ketika negara menghadapi pandemik Covid-19, ketika negara dan masyarakat menghargai jasa bakti para petugas barisan hadapan, negara dan masyarakat bagaikan terlepas pandang, cabaran dan tugas berat yang dihadapi oleh para guru. Sebenarnya guru juga berada dalam kalangan petugas barisan hadapan. Mereka diperlukan mendidik pelajar dalam keadaan yang tidak ada duluan yang belum pernah dilalui. Kaedah pengajaran dan pembelajaran secara bersemuka terhenti, digantikan dengan pendekatan pengajaran dan pembelajaran secara maya. Ketika itu, para guru tidak mempunyai latihan, tidak mendapat sepenuh bimbingan dan tidak berpeluang mendapat pendedahan



dengan kaedah pengajaran dan pembelajaran di rumah. Namun, tanpa memberi helah dan alasan, dalam masa yang singkat, para guru berusaha sedaya mungkin, menyesuaikan diri dengan tuntutan baharu untuk menyempurnakan amanah dan tanggungjawab seorang pendidik.

### **Sidang Jumaat Yang Dirahmati Allah**

Sebagai menghormati khidmat dan jasa bakti para guru, mimbar merumuskan perkara-perkara berikut:

**Pertama:** Guru ialah pekerjaan yang sangat mulia. Islam meletakkan guru di kedudukan tinggi selaras dengan tugasnya yang bukan sahaja membantu membimbing insan dengan ilmu, pengetahuan dan kemahiran untuk tugas-tugas dunia, tetapi turut membekalkan ilmu dan membimbing amal untuk keperluan ukhrawi.

**Kedua:** Menjadikan amalan harian menghadiahkan bacaan surah al-Fatihah mendoakan kesejahteraan guru-guru kita yang masih hidup, lebih-lebih lagi kepada roh mereka yang telah kembali ke Rahmatullah.

**Ketiga:** Mengucapkan penghargaan kepada guru-guru yang pernah mendidik kita, juga kepada guru-guru yang sedang mendidik anak-anak kita. Bagi yang berkemampuan, dizahirkan penghargaan dengan mengutus surat atau kad ucapan terima kasih diiringi hadiah sebagai tanda ingatan.

Khatib mengucapkan "Terima Kasih Cik Gu", yang telah berperanan sebagai ibu, bapa dan sahabat kepada kami dan anak-anak kami, semoga khidmat bakti Cik Gu dikurniakan ganjaran dunia – ganjaran akhirat.

- Penghargaan khusus ditujukan kepada guru-guru yang kita kenali dalam kariah kita, terutama kepada yang telah pergi menghadap Ilahi seperti Almarhum \_\_\_\_\_, \_\_\_\_\_, \_\_\_\_\_, \_\_\_\_\_. Kita doakan semoga Allah SWT melimpahkan rahmat ihsan Nya ke atas roh mereka dan semoga roh mereka ditempatkan dalam kalangan roh para Solihin dan Solehah.

\*[Perenggan ini disebut sekiranya khatib ingin memberi pengiktirafan kepada guru setempat yang telah kembali ke Rahmatullah.]\*



بَارَكَ اللَّهُ لِي وَلَكُمْ بِالْقُرْءَانِ الْعَظِيمِ وَنَفْعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقْبِيلَ مِنِّي وَمِنْكُمْ تِلَاقُتُهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

## Khutbah Kedua

الْحَمْدُ لِلَّهِ<sup>4</sup> حَمْدًا دَائِمًا أَبَدًا. أَشْهُدُ أَنَّ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهُدُ أَنَّ سَيِّدَنَا مُحَمَّدًا عَبْدُهُ وَرَسُولُهُ اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَاصْحَابِهِ أَجْمَعِينَ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ وَكُونُوا مَعَ الصَّادِقِينَ.

**Muslimin yang dirahmati Allah,**

Mimbar menyeru para jemaah agar tetap berpegang kepada aqidah Islamiah berteraskan Ahli Sunnah Waljamaah, yang menjadi warisan Rasulullah SAW, sahabat dan tabiin. Jagalah hubungan dengan Allah SWT dan sesama manusia. Makmurkan rumah-rumah Allah dengan istiqamah mengerjakan ibadah, terutama solat fardu berjemaah. Perbanyak selawat dan salam ke atas Junjungan Besar Nabi Muhammad SAW.

إِنَّ اللَّهَ وَمَلَائِكَتَهُ يُصَلِّونَ عَلَى النَّبِيِّ يَأْيَهَا الَّذِينَ ءَامَنُوا صَلَوْا عَلَيْهِ وَسَلَّمُوا تَسْلِيمًا<sup>7</sup>  
اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَيْتَ عَلَى إِبْرَاهِيمَ وَعَلَى آلِ إِبْرَاهِيمَ وَبَارِكْ  
عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ فِي الْعَالَمِينَ إِنَّكَ  
حَمِيدٌ مَجِيدٌ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ<sup>8</sup>، وَأَصْلِحْ ذَاتَ بَيْنِهِمْ  
وَالْأَفْوَى بَيْنَ قُلُوبِهِمْ وَاجْعَلْ فِي قُلُوبِهِمُ الْإِيمَانَ وَالْحِكْمَةَ، وَثِبِّتْهُمْ عَلَى مِلَّةِ رَسُولِ اللَّهِ صَلَّى اللَّهُ عَلَيْهِ وَسَلَّمَ.

<sup>4</sup> Memuji Allah

<sup>5</sup> Selawat ke atas Nabi Muhammad SAW

<sup>6</sup> Pesan Taqwa

<sup>7</sup> Ayat Al-Quran

<sup>8</sup> Doa untuk Kaum Muslimin



**Ya Allah! Ya Rabbal 'alamin!** Ampunilah apa juga dosa guru-guru kami. Cucurilah rahmat Mu kepada roh mereka yang sedang berada di alam barzakh. Limpahkan keberkatan, kebaikan dan kesejahteraan terhadap guru yang sedang bertugas serta dikurniakan mereka ketabahan untuk terus berbakti.

**Ya Mannan! Ya Razzaq!**, berkatilah hamba Mu yang melaksanakan tuntutan zakat, wakaf dan sedekah. Kurniai mereka rezeki yang berlipat ganda, serta sucikanlah harta dan jiwa mereka; jauhi golongan *fuqara* dan *masakin* daripada kekufuran dan kefakiran yang berpanjangan.

**Ya Dzal Jalaali wal Ikram!**, jadikanlah kami antara hamba Mu yang memelihara amanah. Kuatkan iman kami agar menjauhi perbuatan khianat seperti salah guna harta benda bukan milik kami, memberi atau menerima rasuah, menyalahgunakan kuasa untuk kepentingan diri, serta jauhkan kami termasuk dalam golongan yang mengabaikan tanggungjawab yang diamanahkan.

**Ya Maalikal Mulk!**, jauhi negara kami daripada kehancuran disebabkan perbuatan rasuah; serahkan tanggungjawab pimpinan dan pengurusan negara kami kepada kalangan hamba Mu yang amanah dan ikhlas, serta tegas lagi berani menegakkan kebenaran dan melaksanakan keadilan berlandaskan hukum.

**Ya Malik! Ya Hadi!**, kurniakanlah taufik dan hidayah Mu terhadap raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah Al-Maghfur-Lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

**رَبَّنَا آتَنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ**

فِيَّا عِبَادَ اللَّهِ، هُوَ إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَاءِ ذِي الْقُرْبَىٰ وَيَنْهَا عَنِ الْفَحْشَائِعِ  
وَالْمُنْكَرِ وَالْبَغْيِ يَعْظِلُكُمْ لَعَلَّكُمْ تَذَكَّرُونَ ﴿٤٦﴾ فَادْكُرُوا اللَّهَ الْعَظِيمَ يَذْكُرُكُمْ، وَاسْكُرُوهُ عَلَىٰ  
نِعْمَهِ يَزِدُّكُمْ، وَاسْأَلُوهُ مِنْ فَضْلِهِ يُعْطِكُمْ، وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.